



10. Tschanteda da la suprastanza cumünela in marculli, ils 20.7.2016 a las 19.00 in chesa cumünela S-chanf

Presidi: Duri Campell

Preschaints: Jnes Barblan, Liun Quadri

Absaints: Paolo Bernasconi, Gian Andrea Bott

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 2.100 Revisiun parziela dal reglamaint davart las structuradas da di da la scoula primara da S-chanf
4. 7.900 Concept imsüra da cumpensaziun Flin per deponia Bos-chetta Plauna
5. 0.212 Tscherna nouva collavuratur/a pel büro da turissem
6. 8.001 Revisiun totela ledscha da champagna, pasculs ed alps, segunda lectüra
7. 9.999 Varia

La glista da tractandas vain approveda cun stricher la tractanda 6, causa l'importanza e causa cha 2 commembers da la suprastanza sun absaints

Protocol: Il protocol da la tschanteda dals 06.07.2016 vain approvu unanimamaing

88 0.211 Dumanda da fabrica Pietrogiovanna Francesco, dumanda per müdamaints vi dal proget approvu

Causa cha l'uffizi da construcziun bassa prevezza da refer l'access e la via tres Chapella scu eir d'eriger üna nouva punt da betun sur il Vallember, ho l'uffizi chantunel preschanto uossa ils plans. Zieva chi haun gieu lö püssas tschantedas culs respunsabels dal chantun, causa cha la via existenta vain uzeda per bainquaunt, ho stuvieu Francesco Pietrogiovanna adatter il proget approvu. Zieva cuorta discussiun decida la suprastanza unanimamaing da conceder il permiss pels müdamaints vi dal proget approvu sün parcella nr. 826 i'l quartier „Resgia Chapella“. La suprastanza es pero stuta da l'agir dals uffizis chantunels, cha quels vegnan cun pretaisas pür cur chi s'ho do ils prüms permiss da fabrica. Ils uffizis chantunels vaivan la pussibilitad da s'exprimer düraunt la revisiun totela da la planisaziun, cur ch'id es insomma gnieu miss l'areal da la resgia veglia illa zona da fabrica, e natürelmaing eir düraunt la procedura dal plan da quartier. Ne l'uffizi da construcziun bassa ne l'uffizi per prievels da la natüra nun haun reagieu a sieu temp. La suprastanza es da l'avis, da comunicher als respunsabels dal chantun las constataziuns.

**89 0.211 Dumanda da fabrica
Herzog Lorenz, nouva chesa d'üna famiglia**

La suprastanza piglia cugnuschentscha da la dumanda da Lorenz Herzog per eriger üna nouva chesa d'üna famiglia sün parcella nr. 823 i'l quartier „Resgia Chapella“. Zieva cuorta discussiun decida la suprastanza unanimamaing da conceder il permiss giavüscho cun differentas pretaisas e cundiziuns.

90 0.210 Annunzchas da fabrica

Böhm Ralph saiv intuorn l'üert parcella nr. 795

**91 2.100 Scoula primara
Revisiun parziela dal reglamaint davart las structuradas da di da la
scoula primara da S-chanf**

Per adatter il reglamaint davart las structuradas da di a l'ordinaziun chantunela es bsögnaivel da fer üna revisiun parziela. L'artichel 10 prevzaiva fin uossa, cha per la maisa da mezdi quintan 2 lecziuns. Nouv quinta la maisa da mezdi be auncha 1 lecziun. Zieva cuorta discussiun decida la suprastanza unanimamaing d'approver la revisiun parziela dal reglamaint preschaint cun las seguainta formulaziun: *üna chüra da mezdi per scolara u scolar vain quinteda scu ün'united.*

**92 7.900 Planisaziun dal territori cumünel
Concept imsüra da cumpensaziun Flin per deponia Bos-chetta
Plauna**

La recultivaziun da la deponia veglia in Flin d'eira daspö bgers ans üna pretaisa dals uffizis chantunels. Quella lavur vess chaschuno in mincha cas cuosts per nossa vschinauncha. In connex cun las planisaziuns da las zonas da deponia Bos-chetta Plauna e resgia e magazin forestel e'l cumpenser l'intervenziun illa natüra pel spazi da quellas zonas es gnieu elavuro il rapport „stedi da la situaziun da partenza ed imsüras da cumpensaziun deponia Flin“. L'an passo haun ils respunsabels da l'uffizi da god chantunel comunico in occasiun d'ün supralö, cha la cumpensaziun per la runcheda dal magazin e da la resgia dess gnir realiso in oters lös e na in Flin. Uschè po ster a disposiziun la deponia veglia in Flin plainamaing per la cumpensaziun da las intervenziuns illa natüra dal spazi zona da deponia Bos-chetta Plauna permiss, chi vain valüto cun 141'000 puncts. Ill'ultima tschanteda da la suprastanza ho il planiseder da la firma Edy Toscano SA preschanto il concept scu eir il sböz da la cunvegna chi dess gnir stipuleda traunter la vschinauncha da S-chanf, la Bos-chetta Plauna SA e'l chantun. Scu prossem pass ho la suprastanza cumünela d'approver il concept scu eir la cunvegna scu basa per tratter culs 2 oters contrahents. In mincha cas es il concept ün inrichimaint per nossa vschinauncha. A nu vain müdo zona e la lavur vain fatta tres la Bos-chetta SA, uschè chi nu resultan üngüns cuosts. La suprastanza fo üna lectüra e decida unanimamaing d'accepter la cunvegna scu eir il concept e da fer las trattativas bsögnaivlas.

**93 0.212 Persunel
Tscherna nouv/a collavuratur/a pel büro da turissem**

Sün la publicaziun per la piazza libra d'ün/a collavuratur/a pel büro da turissem sun entredas 5 annunzchas. Zieva chi haun gieu lö ils discuors cun las candidatas, decida la suprastanza unanimamaing da tscherner a Daniela Holzer da S-chanf scu nouva collavuratura. Ella cumainza sieu impieghi ils 01.10.2016.

94 9.999 Varia

Il president orientescha sur dal plan da master passlung e comunichescha, chi'd es gnieu giavüscho dals respunsabels, cha la loipa da colliaziun da La Punt fin Zuoz dess gnir realiseda in futur già ils 10 december e na pür scu fin uossa ils 23 december. La loipa A.I. vin Resgia a Zuoz dess gnir realiseda pü tard, nempe pür süls 23 december, fin uossa d'eira previs ils 15 december.

Inavaunt orientescha'l, ch'in gövgia, ils 21.07.2016 ho lö la fundeda da l'Engadin St.Moritz Tourismus AG cun l'act da suottascripziun e la tscherna dal cussagl administrativ.

A las 20:15 vain la tschanteda alveda.

In buna fè

L'actuar:
D. Schwenninger